



Cussegl da vischnaunca
11-2017/2020

Canalisaziun Via Veglia

Damonda da credit

M E S S A D I

dalla suprastonza communal a al cussegl da vischnaunca

Stimau signur president
Preziadas signuras cusseglieras
Preziai signurs cussegliers


El decuors dil atun 2017 vegn la surbaghegiada enteifer il quartier Via Veglia realisada. Damai che quella cumpeggia pliras parcelas, sto la canalisaziun publica vegnir dislocada. Tenor las prescripziuns dil art. 83 al. 2 dalla lescha da baghegiar ei il possessur dil conduct responsabels per la dislocaziun da quel. La suprastonza communal ha en in'emprema etappa concediu in credit da frs. 92'000.-- per la dislocaziun dalla canalisaziun enteifer igl intschess dil quartier Via Veglia sin ina lunghezia da 100 m. En quei liug sto la canalisaziun vegnir construida cun in diameter da 400 mm. Cun quella dislocaziun vegnan ils basegns dalla surbaghegiada alla Via Veglia resp. las obligaziuns dil plan da quartier Via Veglia adempli.

La deflussiun dalla Via Cons e dalla Via Lucmagn caschuna dapi onns considerablas difficultads el contuorn dil baghetg dalla Banca Raiffeisen. Cun la dislocaziun dalla canalisaziun a favur dil quartier Via Veglia duei perquei era gest la deflussiun dalla Via Lucmagn vegnir spartida dall'aua tschuffa. Consequentamein sa la situaziun hidraulica dalla canalisaziun vegnir meglierada e la serenera descargada. Igl uffeci da construcziun bassa dil cantun Grischun separticipass cun rodund frs. 24'000.-- vid ils cuosts per la dislocaziun e completaziun dalla canalisaziun. La contribuziun digl uffeci da construcziun bassa corrispunda alla cumpart dil quantum aua calculaus sin fundament dalla surfatscha dalla via.

Per che la reit da deflussiun (canalisaziun) el contuorn dil quartier Via Veglia, la Via Veglia sezza, la Via Lucmagn e la Via Sogn Gions seigi completa, eis ei era previu da colligiar la canalisaziun d'aua schubra - realisada en connex cun la sanaziun dalla Via Sogn Gions - cun la canalisaziun nova enteifer il quartier Via Veglia. Sil tschancun dalla Via Veglia entochen tiel quartier Via Veglia duei la canalisaziun d'aua tschuffa vegnir remplazzada ed adattada.

Bein ei quell'investiziun colligiada cun considerabls cuosts, denton possibilitescha la cumbinaziun da pliras sinergias la pusseivladad da meglierar - cun cuosts raschuneivels - considerablamein la situaziun hidraulica dalla canalisaziun el contuorn Via Lucmagn, Via Cons, Via Sogn Gions e Via Veglia.

A vosta da quellas lavurs ha la Corporaziun d'aua Spina da Vin decidiu da sanar siu conduct cun arver da niev il quartier Via Veglia resp. remplazzar il conduct che vegn neu dalla Via Cons. El medem mument vegnan realisai ulteriurs provediments sco electricitad, scaldament lontan e telecomunicaziun. Aschia eis ei pusseivel da nezegiar sinergias ed optimar ils cuosts per tuts purtaders da provediment participai al project.



L'execuziun dallas lavurs duei succeder il medem mument sco la surbaghegiada, per gronda part quest atun ed il rest la primavera 2018.

Cunquei che la Corporaziun d'aua Spina da Vin sanescha in tschancun da sias lingias ella Via Veglia, ei quella cuvrida da remplazzar praticamein sin l'entira ladezia. Per raschuns da detretschar il traffic motorisau dil traffic plaun setschenta la damonda da realisar sin quei tschancun ina cuvrida cun sulada. L'intenziun ei da cuntinuar pli tard cun ina cuvrida da sulada en connex cun ina sanaziun da lingias da providiment. Sper quei che la sulada duei differenziar denter vias per pedunzs ed il traffic motorisau, duei quella era sustener la muntada historica da nossas sendas e forsa valetar pli fetg il caracter dil quartier da Raveras, che ha el decuors dils davos decennis buca adina anflau la duida muntada ch'el ha.

Cuosts

	<i>frs.</i>
Dislocaziun canalisaziun existenta en connex cun la surbaghegiada	84'500.--
Sanaziun part Via Sogn Gions, Via Lucmagn, Via Veglia	94'000.--
Cumpart digl uffeci da construcziun bassa vid la deflussiun d'aua schubra	./.
Cuvrida e sulada tschancun Via Veglia	24'000.--
Projectaziun, cuosts accesoris, TPV	29'500.--
	<u>41'000.--</u>
Total cuosts	225'000.--
Credit gia concediu dalla suprastonza communal per la dislocaziun dalla canalisaziun tenor plan da quartier Via Veglia (obligaziun)	./.
	<u>92'000.--</u>
Cumpart per sanar e completar la canalisaziun el contuorn dalla Via Veglia, dalla Via Sogn Gions e dalla Via Lucmagn	133'000.--

Finanziaziun

Ils cuosts per la deflussiun ein da financiar sur la finanziaziun speciala canalisaziun e serenera cto. 7201.5032.12 (canalisaziun Via Veglia). Il quen d'investiziun preveda pigl onn 2017 la summa da frs. 95'000.-- per la dislocaziun dalla canalisaziun. Ina part dalla summa preveda per las investiziuns supplementaras vegness ad occuorer igl onn 2017, il rest vegness integraus el preventiv 2018.

Ils cuosts per la cuvrida ein da financiar sur il cto. 6150.3141.00. Quella summa ei da risguardar el preventiv 2018.

Ponderaziuns finalas

Ils cuosts nets suenter la deducziun dalla contribuziun digl uffeci da construcziun bassa per sura lavurs muntan a frs. 225'000.--. Per saver realisar las lavurs da dislocaziun en connex cun la nova surbaghegiada ha la suprastonza communal sco gia menziunau concediu ils 14 d'uost 2017 in credit da frs. 92'000.-- per las lavurs d'impresari, aschia ch'il credit necessari per realisar las ulteriuras lavurs munta a frs. 133'000.--. Per las cumpetenzas finanzialas vala igl art. 70 dalla constituziun communal che secloma sco suonda: "*Per tuttas cumpetenzas finanzialas cuntenidas en questa constituziun, vala il credit netto, qvd. il credit total cun deducir las contribuziuns publicas e privatas.*"

Proposta

La suprastonza communal

propone

al cussegl da vischnaunca:

- da conceder en connex cun la dislocaziun dalla canalisaziun quartier Via Veglia in credit net da frs. 133'000.-- per sanar e cumpletar la canalisaziun el contuorn dalla Via Veglia, dalla Via Sogn Gions e dalla Via Lucmagn.

Suprastonza communal Disentis/Mustér

Il president:

Il canzlist:



Robert Cajacob



Andri Hendry

Disentis/Mustér, ils 28 d'uost 2017